

Cederakan bapa guna pinggan kaca, mahkamah tolak pengakuan salah lelaki

KUCHING: Mahkamah Sesyen semalam menolak pengakuan bersalah seorang lelaki yang dituduh mencederakan bapa kandungnya menggunakan sebiji pinggan kaca pada hujung Jun lalu.

Hakim Maris Agan menolak pengakuan Irwan Shah Bakar, 42, selepas tertuduh mempertikaikan eksibit fizikal iaitu sebiji pinggan kaca yang dikemukakan oleh pihak pendakwaan.

Menurutnya, pinggan berkenaan bukan pinggan yang sama bersabit kejadian tersebut dan ia tidak sepatutnya berada dalam keadaan pecah.

Mengikut pertuduhan, dia didakwa dengan sengaja menyebabkan kecederaan terhadap bapa kandungnya yang berusia 63 tahun dalam satu kejadian pada 27 Jun lalu, sekitar jam 6.50 petang di hadapan rumah mereka sekeluarga di Kampung Semerah Padi Fasa 1 di sini.

Difahamkan, tertuduh menggunakan pinggan kaca tersebut untuk mencederakan mangsa sehingga mangsa

mengalami kecederaan di bahagian telinga.

Terdahulu pada 30 Jun 2022, lelaki yang tidak diwakili peguam itu mengaku bersalah atas pertuduhan dibuat mengikut Seksyen 324 Kanun Keseksaan dan dibaca bersama Seksyen 326A kanun sama.

Sabit kesalahan, boleh dijatuhi hukuman penjara sehingga 10 tahun atau denda atau sebatan atau mana-mana daripada seksaan tersebut.

Mahkamah bagaimanapun menetapkan semalam untuk sebutan semula kes bagi memberilaluan kepada pihak pendakwaan mengemukakan fakta ringkas kes dan eksibit.

Tertuduh seterusnya dibebaskan dengan jaminan RM4,000 tunai dengan seorang penjamin tempatan.

Sehubungan itu juga, Hakim Maris semalam menetapkan kes disebut semula pada 4 Ogos untuk pengurusan kes dan melanjutkan ikat jamin tertuduh.

Pendakwaan dilakukan oleh Timbalan Pendakwa Raya Sangari Ponnann.